

- उपराष्ट्रपति जगदीप धनखड़ दो दिन रा दौरा सारू जैसलमेर पधार्या-बी.एस.एफ. रा जळसा मांय शिरकत करेला।
- विधानसभा रो दूजो सत्र 3 जुलाई ऊं सरू व्हेला।
- सुप्रीम कोर्ट नीट यूजी परीक्षा मांय ग्रेस नम्बर हासिल करण वाळा 1 हजार 5 सौ 63 विद्यार्थियां रो स्कोर कार्ड रद्द कीनो-एनटीए, ग्रेस नम्बर वाळा उम्मीदवारां री 23 जून ने ओजू परीक्षा व्हेला।
- राज्य मांय केई ठौड़ां बिरखा व्हेवण ऊं गर्मी ऊं साता मिली- कोटा, जयपुर, भरतपुर अर बीकानेर संभाग मांय आवता 2-3 दिन कठे-कठे हल्की बारिश रा आसार।

000

उपराष्ट्रपति जगदीप धनखड़ जोड़ायत डॉ. सुदेश धनखड़ सागे आज जैसलमेर पधार्या। हवाई अड्डा माथे वां रो संसदीय कार्य मंत्री जोगाराम पटेल, नगर परिषद रा सभापति हरिवल्लभ कल्ला, जिला कलेक्टर प्रतापसिंह नाथावत, एस.पी. सुधीर चौधरी अर फौज रा अहलकार स्वागत कीनो। उपराष्ट्रपति वायु सेना रा खास हैलीकॉप्टर मांय सवार व्हे र पाकिस्तान ऊं लाग्योड़ी सरहद माथे बण्या तनोट माता मिंदर मांय दर्शन कीना। उपराष्ट्रपति ने तनोट माता मिंदर परिसर मांय बण्या विजय स्तंभ माथे बी.एस.एफ. रा जवान गार्ड ऑफ ऑनर दीनो। वे शहीद स्मारक माथे फूल चढ़ा र शहीदां ने सिरधाभाव सागे याद कीना। उप राष्ट्रपति बी.एस.एफ. री बबलियानवाला सीमा चौकी रो दौरा कर र बी.एस.एफ. रा जवानां ने संबोधित कीना। उपराष्ट्रपति रो काल जैसलमेर मांय बी.एस.एफ. री 154 वीं बटालियन रा एक जळसा मांय शिरकत करण रो कार्यक्रम है।

000

16 वीं विधानसभा रो दूजो सत्र 3 जुलाई ऊं सरू व्हेला। राज्यपाल कलराज मिश्र इण री मंजूरी दे दीनी है। ई सत्र मांय राज्य रो पूरो बजट पेश कर्यो जावेला। लोकसभा चुनाव रे कारण केन्द्र मांय अंतरिम बजट पेश करी ज्यो हो, ज्यीं कारण राज्य मांय ई विधानसभा रा लारला सत्र रे दौरान अंतरिम बजट पेश करी ज्यो हो।

000

केंद्रीय युवा मामलात अर खेल मंत्री डॉ. मनसुख मांडविया आज नई दिल्ली मांय भारतीय ओलंपिक संघ-आई.ओ.ए रा अहलकारां सागे मीटिंग कर र ई साल व्हेवण वाळा पेरिस ओलंपिक खेलां ऊं जुडी तैयारियां रो जायजो लीनो। मीटिंग मांय राज्य मंत्री रक्षा खड़से ई मौजूद रही। मीटिंग पाछे खबरनवीसा सागे बातचीत करता थकां भारतीय ओलंपिक संघ री अध्यक्ष पी.टी. उषा कह्यो के खिलाड़ियां ने सगळा जरूरी सुबीता मुहैया करावण माथे खास ध्यान दियो ज्यो है। वे ई दफा लारला ओलम्पिक खेलां ऊं बत्ता तमगा जीतण री आस जतायी।

000

मुख्यमंत्री भजनलाल शर्मा आज गंगापुरसिटी जिला मांय टोडाभीम उपखण्ड रा मुड़िया गांव मांय गुर्जर नेता कर्नल किरोड़ी सिंह बैसला री मूरत रो अनावरण कीनो। ई मौके मौजूद जनता ने सम्बोधित करता थकां मुख्यमंत्री केंद्र अर राज्य सरकार री न्यारी-न्यारी योजनावां रो फायदो लेवण री अपील कीनी। मुख्यमंत्री मुड़िया गांव मांय सामुदायिक स्वास्थ्य केंद्र खोलण रो ऐलाण कीनो अर कर्नल किरोड़ी सिंह बैसला रा नाम ऊं शिक्षा केंद्र सरू करण रो भरोसो दिरायो। मुख्यमंत्री सरकार कानी ऊं किसानां रा भला सारू करी ज्या फैसलां री जाणकारी ई दीनी।

ई पाछे मुख्यमंत्री डीग जिला रा सुंदरावली गांव मांय शहीद जीत राम गुर्जर री मूरत रो अनावरण कीनो। ई मौके वे शहीद जवान रा मायतां ने नमन करता थकां कह्यो के गांव रा अस्पताल अर स्कूल रा नाम शहीद जीत राम गुर्जर रा नाम परां रख्या जावेला। मुख्यमंत्री सुंदरावली गांव ऊं हाई-वे निकाळबा रो वायदो ई कीनो। वे राज्य मांय सात करोड़ पौधा रोपण रा अभियान रो जिक करता थकां किसानां ऊं स्कूलां, अस्पतालां अर दूजी ठौड़ां पौधा रोपण री अरज कीनी।

000

पाकिस्तान ऊं आ र जयपुर मांय बस्या छह जणा ने जयपुर री अतिरिक्त जिला कलेक्टर शेफाली कुशवाहा आज भारत री नागरिकता रा कागजात सूप्या। जयपुर मांय हाल ताई सवा तीन सौ जणां ने भारत री नागरिकता दीरीजी है।

000

सुप्रीम कोर्ट मेडिकल प्रवेश परीक्षा—नीट—यूजी मांय शामिल व्ह्या वां सगळा एक हजार 563 विद्यार्थियां रा स्कोर कार्ड रद्द कर दीना है, ज्यां ने ग्रेस नम्बर दिया ज्या हा। ई पाछे राष्ट्रीय परीक्षा एजेंसी—एनटीए कह्यो के आं सगळां विद्यार्थिया री नीट परीक्षा 23 जून ने ओजू ली जावेला। ग्रेस नम्बर वाळा जो विद्यार्थी ओजू परीक्षा नी देवेला, वां रो स्कोर कार्ड ग्रेस नम्बर रे बिना जारी कर्यो जावेला। एनटीए कानी ऊं आज जारी एक पानडी रे मुजब ई बारा मांय बेगी ई सार्वजनिक सूचना जारी करी जावेला अर आं उम्मीदवारां ऊं ई—मेल रे जरिये ई संपर्क कर्यो जावेला ताकी वां ने अधिकारिक जाणकारी दी जा सके।

एनटीए रे मुजब दोबारा परीक्षा लेवण रो फ़ैसलो एनटीए री उच्चाधिकार प्राप्त समिति री रपट माथे सुप्रीम कोर्ट री टिप्पणी रे मुजब लियो ज्यो है। एनटीए रे मुजब ऐडा सगळा एक हजार 563 विद्यार्थियां ने दिया ज्या पूरक अंक पाछा ले लिया ज्या है। ई बीचे केंद्रीय शिक्षा मंत्री धर्मेन्द्र प्रधान नीट—यूजी परीक्षा रा पेपर कथित तौर ऊं लीक व्हेवण ऊं नट ग्या है। वे आज नई दिल्ली मांय खबरनवीसां सागे बातचीत करता थकां कह्यो के नीट परीक्षा मांय कोई घोटालो नी व्ह्यो है। शिक्षा मंत्री नीट परीक्षा रा मुद्दा माथे सुप्रीम कोर्ट रा फ़ैसला रो स्वागत कीनो। वे विद्यार्थियां अर वां रा मायतां ने न्याय दिरावण रो भरोसो दिरायो।

दूजी कानी कांग्रेस नीट परीक्षा मांय कथित गड़बडियां रा मुद्दा माथे सुप्रीम कोर्ट री निगराणी मांय जांच करावण री मांग कीनी है। पार्टी रा अध्यक्ष मल्लिकार्जुन खड्गे सोशल मीडिया माथे पोस्ट कर र नीट परीक्षा मांय धांधली व्हेवण, पेपर लीक व्हेवण अर भ्रष्टाचार व्हेवण रो आरोप माण्ड्यो।

000

नुवा बणायी ज्या तीन आपराधिक कानून एक जुलाई 2024 ऊं लागू व्हे जावेला। आं कानूनां रा बारा मांय जाणकारी देवण सारू आकाशवाणी समाचार जयपुर री ओर ऊं प्रादेशिक समाचार बुलेटिन मांय नुवी श्रृंखला चलायी जा रही है। आज पेश है भारतीय साक्ष्य अधिनियम, 2023 रा इलेक्ट्रॉनिक तरीका ऊं दिया ज्या सबूतां रा बारा मांय नुवा प्रावधानां री जाणकारी। ई कानून मांय इलेक्ट्रॉनिक तरीका ऊं दिया ज्या सबूतां ने अदालत मांय भौतिक सबूतां रे बराबर मानण रो प्रावधान है। ई रा तहत अनुसूची मांय पेश करी ज्या दो नुवा फॉर्म डिजिटल सबूतां रा प्रमाणीकरण अर वां री जांच मांय तेजी लावे है अर लारला कानूनां रा तहत सामी आयी चुनौतियां रो हल करे है। ई कानून री धारा 105 रा तैत ज़ब्त करी ज्या सामान री गवाहां कानी ऊं सही करी ज्यी लिस्ट अर तलाशी अर ज़ब्ती रा काम रे दौरान वीडियो बणावण री प्रक्रियावां शामिल करी ज्यी है। नुवा कानून मांय अ रिकॉर्डिंग जज सामी तुरत पेश करण रो प्रावधान ई करी ज्यो है ताकि सबूतां सागे छेड़छाड़ नी करी जा सके। ई कानून मांय शारीरिक या मानसिक तौर ऊं दिव्यांग पीड़ित लोगां सारू पुलिस बयानां अर ऑडियो—वीडियो रिकॉर्डिंग जरूर करण रा प्रावधान करी ज्या है।

000

मुख्य सचिव सुधांश पंत दसवां अंतरराष्ट्रीय योग दिवस री तैयारियां रो जायजो लेवण सारू आज जयपुर मांय आयुष, स्वास्थ्य, गृह, शिक्षा, सूचना अर प्रौद्योगिकी, ग्रामीण विकास अर पंचायती राज विभाग रा अहलकारां सागे मीटिंग कीनी। मीटिंग मांय स्वास्थ्य सचिव पूनम बतायो के ई दफ़ा ई राज्य, जिला अर ग्राम पंचायत स्तर ताई योग रो अभ्यास कर्यो जावेला।

000

राज्य मांय आज केई ठौड़ां बिरखा व्हेवण ऊं गर्मी ऊं थोड़ी साता मिली। जयपुर मांय संवारे ऊं बादळा मंड्या रेहवण पाछे दोपेरां पाछे न्यारा—न्यारा हलकां मांय बारिश व्ही। झालावाड़ मांय ई बिरखा व्हेवण ऊं पारो थोड़ो उतर्यो। बूंदी मांय दोपहरां पाछे छांटो—छिड़को व्ह्यो। झुन्झुनू अर भरतपुर मांय आंधी चालण पाछे व्ही बिरखा ऊं मौसम सुहावणो व्हे ग्यो। मौसम विभाग रा जयपुर केन्द्र रा निदेशक राधेश्याम शर्मा आज कोटा, उदयपुर, जोधपुर अर बीकानेर संभाग मांय कठे—कठे बिरखा व्हेवण रा आसार जताया है।

000

जयपुर मांय निवारू रोड ऊं गलता गेट बीचे चालण वाळी लो—फ़्लोर बसां ओजू चालणी सरू व्हे ग्यी है। उद्योग मंत्री राज्यवर्धन सिंह राठौड़ आज ई री सरूआत कीनी। ई गेला माथे करीब एक साल पैली लो फ़्लोर बसां चालणी बंद व्हे ग्यी ही।

000